

平定浙東紀畧

國朝蕩平海宇論功受賞封吳三桂平西王尚之孝平南王耿  
精忠靖南王號稱三藩

恩至渥也乃久而驕恣漸啓不臣之心我

皇上灼於幾先將及其未發而撤之俾長保有其功名夫何捐棄  
休嘉抗不受

詔吳以滇反尚以粵反而耿亦於甲寅三月二十四日耀兵仙  
霞嶺直犯浙東連陷衢州府之常山等縣夫衢當浙閩之  
衝爲三省咽喉總督李之芳親統官兵赴衢勦撫然而脅



從漸多伏莽探丸輩各受僞劄雞連豕突靡然騷動其尤著稱者則有僞左軍都督曾養性僞中軍都督馬九玉僞前軍都督吳長春僞後軍都督馬成龍張公萬僞陸路都督馬仕玉徐尚潮劉清朱廣佐朱德甫僞水師都督朱飛熊張廣文朱光祖僞前鋒都督江元勳郭奇僞鎮海都督總兵林冲僞恢疆伯王國斌僞定東伯安遠將軍祖弘勳僞定遠將軍劉建忠僞寧武將軍熊進効僞經畧蔣德輳僞驍騎都尉連登雲僞親軍都尉孫可德僞副都統朱雲從僞都督僉事曾實李榮春僞總兵仇天升毛念益朱福

陳調貴金應祐劉秉仁龐顧明朱榮春朱天貴李吉徐文英蕭鳳劉常王子恩賈文孝王子輔李甲郭廷侯謝憲馮公輔陳禮僞副總兵林必忠陳啟萬徐國先俞光國周興劉應王宗祿朱正三劉大頭黃文玉朱起龍藍理王應元孫國成陳鵬和賓僞都司張雄陳彪沈虬王得善陳貴僞副都統陳紀僞叅將趙明徐國顯趙彪僞遊擊張應方馬國明萬得勝僞守備閔先金彪王明何申石仁俞望僞千總陳德魯張治陳新江謝春徐起李應龍李培王得禮韓鳳僞把總馬有功王印相丁彩俞明方興薛本錢有功等

屯聚金衢溫處台寧諸郡掠地陷城凡深山邃谷之中巨浪洪波之際無非逆黨首尾相應蔓難剪除而紹郡奸民聞風煽惑亦羣起應之如僞都督王山金國蘭邱恩章楊四邢起國胡雙奇王稅俞鼎臣何四乘僞督師董安邦僞將軍何國璉尉勝甫王茂生祝祿方萬惠僞軍師張先知僞監軍道郭崇義王志大馬君卿李茂方蔡繼遵僞理刑董希聖僞會應侯吳興賢僞總兵張化宇任玉如陳豈凡裘開先周瑞龍王茂公范洪聚方得功方萬全李見如婁麟生楊應芬許恩盧楚珮何國忠王允中何甫陳永甫陳

君玉易秀之張茂康僞副將魯元之弓廷弼毛汝初馬公世馮保陳秀董文昌董懋僞叅將張鳳岐俞榮呂伯成王龍郭榮徐子成熊中馮太徵周君錫趙沛卿趙亦賢僞遊擊鍾維城祁可能全振僞都司章必顯錢勝沈虬僞守備李君美全顯陳令之鮑惟元陳秀王奇馬瑞生陳君錫尉伯明楊錦李君玉僞千總沈成僞把總宋復明張德化賊首方洪宗陳弘道楊似龍易五陳一莫仰時等各擁衆數千連營結寨互爲聲援初則劫掠富室繼且剝削窮民而鄉城村鎮總無一寧靜之處矣會三衢告警郡中防兵皆

奉檄調援存不滿百賊遂萌窺伺想合暨唻上虞新昌之  
賊數萬衆於七月十三日直抵博古嶺守備何其與戰於  
斑竹菴不利而退賊乘勝犯常禧門鎮將許捷方合婚置  
酒張樂警報頻聞但麾之使去而已知府許弘勳曰古太  
守任兼文武殺賊安民固職分所當爲今日正人臣効力  
時也乃出家丁民壯得數百人分兩道出斬首百餘級日  
晡賊從南門渡河攻稽山門門故僻隘又城垣多傾頽處  
不足以守乘城者咸股慄弘勳介馬疾馳亟命燃炬運石  
堵塞并撤春波橋以遏其衝賊至用巨礮下擊中皆糜碎

復命善射者從墀隙叢射多應弦而斃賊不敢上有肉薄  
先登者則推巨石摧壓之自晨至暮自昏達旦所殺傷不  
可數計黎明賊就食邨落已復環城呼噪弘勳令兵民更  
番蓐食以待薄暮賊從箬簣山俗呼遠門山渡河移柵五雲門  
縱火燒民舍烟焰蔽天城中多賊諜謀內應弘勳偵知之  
下令家懸一燈人自爲守晝聽與販夜禁行者違令突出  
用賊諜論羣黨因不得逞次日賊攻五雲門多拋戈甲裸  
而揮羽或踞門嘲笑無復整飭意弘勳曰賊驕且憊可以  
出擊於是部署士馬啓門而出賊蝟集接戰弘勳率藤牌

手陳勝等左右翼擊凡數合斬首四百餘級溺水死者又  
四五百人賊披靡走追至五里舖而還賊猶收餘衆作飛  
橋運攻具以圖僥倖而氣已盡奪十五日會城寧郡援兵  
至自西門飯於演武場賊尚未知也飯畢弘勳啟常禧門  
出師襲擊賊敗由牛角灣奔至亭山又踞高思闕不知弘  
勳已先期請濟師夾擊矣是役也斬獲以千百計郡圍始  
解而散之他邑仍肆橫如故八月

大將軍康親王

固山貝子寧海將軍奉

天子命來討逆耿師次杭州商酌攻取次第

貝子曰逆賊甫叛而即寇浙是以浙為藩籬也破其藩籬非特  
逆款不敢出閩即尚與吳亦何敢徑下江南故欲平閩必

先平浙方今曾養性屯聚黃巖總兵阿爾泰敗績降賊即

名劉建薩克蘇部滿兵馳救復大敗自刎死則平浙又當

忠者先平台台平而後取溫入閩勢如破竹矣請為王親征之

康親王大喜嘉納謂深知兵法者九月

貝子統兵赴台州

右 先子日記也憶是時 先子抱病卧床第既焦

心於越寇復望眼於

王師時時詢中外情狀手書簡端宗黨請節勞 先子曰吾將  
俟蕩平日恭頌

神聖威武耳及聞 郡守許公全城之役喜動顏色二三父老  
知 先子意為道攻戰逐北狀 先子於呻吟之餘  
次第登記幾忘二豎之交侵也八月

康親王同

固山貝子奉

命討逆師次會城九月

貝子統兵親征台州為取溫入閩計 先子以手加額曰事從

此定矣方日望捷音而病轉劇未獲卒業謹弄篋笥

父執時向 不肖 假觀往往據為實錄今 不肖 幸能讀

父書追憶曩時續成是編而轉嘆 先子之不及見

也泣然泣下錄之左方 先子諱自遠字子望會稽

縣儒學生時康熙戊辰孟夏上浣二日不肖男易百

拜謹識

貝子將至嵯縣聞郡城敗回之賊復嘯聚為亂

貝子曰賊敢於猖獗者以

天兵方問罪于閩不暇及此耳均吾赤子忍目擊顛沛而不為救  
援且留此適足貽害於是召叅將滿進貴知府許弘勳知  
縣張逢歡而授之方畧撥兵一千令急進勦會趙沛卿楊  
四邢其古趙亦賢王茂公陷城劫庫焚署之報至遂命滿  
進貴張逢歡回縣勦滅凡殺賊百餘其黨分竄石山頭官  
庄溪頭上王蔣岍橋楊長橋等處

貝子給把總馬國常兵二百名令防守縣城檄叅將滿進貴知  
府許弘勳都司王德輔守備周鳳滿明侯知縣張逢歡領  
馬步兵分路進攻大敗偽總兵俞鼎臣于沼湖追至蔡家

灣九里泉戮偽副將以下四人越三日復擊之生擒賊首  
董懋斬首七百餘級賊抱頭鼠竄至崇仁富順等鄉越五  
日官兵又及之賊復竄至長樂太平開元等處

貝子嚴檄督戰進貴等益用命分兵翼擊大破之斬首一千餘  
級奪還俘掠無算釋良民之被脅入賊者一百七十五人  
數十村男婦歡聲載道滿進貴等遂領兵回嶧而偽總兵  
俞鼎臣趙亦賢王茂公趙沛卿復招合潰兵溯剡溪而上  
沿途劫殺

貝子曰山谷險阻無賴亡命之徒依為巢穴朝集暮散當以計

取未可力攻也乃佯檄班師大會僚屬鼓樂侑飲賊偵知之亦卸甲韜戈劇飲爲樂至二鼓密遣進貴等統兵三路進擊賊倉皇不知所措生擒邱恩章趙沛卿趙亦賢及偽總兵王稅軍師張先知副將馮保監軍郭崇義王志大總兵何四乘叅將郭榮遊擊全德祁可能都司章必顯等九十餘人悉斬之

貝子乃召守令而諭之曰嵯邑平矣雖然崇山峻嶺此輩尚多安保其不復爲患今台州告急未可頓兵善後之策是在守令當念今日之流賊即昔日之良民或逼飢寒或被脅

挾若盡驅而戮之亦屬可憫故治軍原以綏民而弭盜不全恃武宜選端方正直之人前往各寨宣示

皇上好生之德開陳禍福廣行招徠果其執迷不悟則統兵殲除之庶盜源可清而民生易遂矣弘勳等遵諭奉行遂有原任福建尤溪縣知縣虞敬道考授州同虞卿張存性考授縣丞虞相虞嗣賓陳加猷呂之文監生章尚策謝琛鄭鼎臣范嘉相趙際昌胡世寧生員王敷錫商延祖沈五杲金鼎煒劉廷梓武進士茹昌誥王之策武舉王先采武生王慶元虞典濮漢呂之文紳衿管成唐麟徵陳一新謝君美



平定州東紀略  
効用都司成惟悌徐士祥効用通說陶國柱胡士元張伯  
貞王芝効用官孟慶毛世科朱武楊廷珍趙泉徐彪沈英  
投誠官杜進先團練成孝先金世貴金炫李兆吉兵丁沈  
韜等各願前往招撫而虞卿章尚策又密陳平越勦撫事  
宜啟請

康親王蒙委督練勦撫乃親裹餼糧深入賊巢反覆開導一時  
費偽印偽勅率衆歸順者多至萬餘少亦不下二三千人

其偽官姓名爵里載在保越錄茲不具錄

尚有遠聯閩賊近結土豪希死灰之  
復燃者如王茂公楊四邢起國胡雙奇金國蘭等且連陷

浦江諸暨上虞餘姚四縣據城自守

康親王赫然斯怒帝夸蘭大白色蘓金華副將牟大寅撫標遊  
擊田萬侯隨征同知姚啓聖各統標兵三路進攻大戰於  
紫閣山賊衆潰散偽都督朱德甫恃其驍勇領兵後殿姚  
啓聖奮擊之斬於陣上餘各披靡走遂復諸暨浦江二縣  
康親王料賊兵之散也易其合也亦易留兵四百名命姚啓聖  
鎮守諸暨縣偽都督王山偽總兵楊芬生盧楚佩等果乘  
虛率偽兵三萬七千五路侵犯姚啓聖孤軍力戰左右衝  
突如入無人之境將士効命亦無不一以當百大敗之於

平定浙東紀畧 九  
楓橋斬獲不可勝計自偽都督以下大小員弁皆就招撫  
時夸蘭大張碩志奉

貝子命往杭州取砲遇偽總兵王茂公等于上虞之平家堡率  
兵往攻同知張汝伯千總李應科夾擊之賊被殺隋江苑  
者無算諸暨上虞新嵎之賊悉平當

貝子之未至台也偽都督曾養性偽將軍祖弘勳阿爾泰屢挫  
王師黃巖天台仙居三縣悉為賊所據又遣兵分守天台寧波  
大道斷我糧運水陸之兵逼近城池斗米值至三百錢亦  
不可猝得人心洶洶聞

大軍至百姓遮道跪迎

貝子目擊心傷首發銀四百兩諭監司守令轉傳紳士議賑於  
是各捐助有差設粥以濟飢民藉以存活多感激泣下者  
惟諸敗將各凜鈇鉞之誅而

貝子且慰勞之椎牛行賞軍士咸願立功以報

貝子歷閱形勢召諸將諭之曰大軍十萬月支米三萬七千有  
奇而必踰桐嶮嶺運至既羈時日亦極艱辛非急開大路  
不可乃遣提督塞白理領兵守蔡嶺都統周雲龍領兵守  
白塔以通寧波天台下令各營堅壁固守毋得輕舉而密

訪地方險易賊衆情形胸中已有勝算但攻陸則海寇入  
攻海則陸寇至無之無船不能飛渡於是檄委同知董造  
併募水手操演凡軍前應需器物無不畢具正議興師而  
僞都督僉事曾實率兵七千據黃水山上游奪取要路  
貝子命副都統機爾他佈提督段應舉等領滿漢兵二千分軍  
進勦賊憑高山以戰我軍仰攻久未得拔都司黃義等率  
猛士四十人間道歷險而上直出賊右鎗砲齊發賊陣遂  
移陣斬僞副將陳鵬等凡若干員殺賊千餘燬其營寨  
貝子又慮天台之賊在在蟻聚糧運經過恐為所劫遣夸蘭大

西米納等領滿洲蒙古綠旗兵二千協同機爾他佈守禦  
至子雲山大敗僞都督陳世鍾追至九里寺山又大敗僞  
總兵陳禮殺賊一千五百餘人叅將滿進貴王國相又大  
敗僞總兵胡雙奇於天鳳寺殺賊六百餘賊聞風膽落僞  
都督朱廣佐僞水師都督朱光祖遂各率僞屬來降二朱  
者曾養性腹心也剽悍善戰前此領水師於小梁山江中  
以拒我師

貝子屢使招安不服至是歸順僞仙居知縣張廣安馳報曾養  
性請益兵來援乃遣僞鎮海都督總兵林冲僞副將林啓

萬等領衆萬餘固守仙城

貝子命副都統伯穆黑林倭申巴圖魯等分三路進天台以擊之戰於白水洋殺賊三千有奇焚燬賊寨一十三座直至仙居縣境伯穆等謂前知縣鄭錄勲曰

貝子仁武不殺凡賊陷城池果能悔罪來降均免誅戮可傳諭城中及早投順毋使數萬生靈盡遭荼毒錄勲兩往招降賊不從遂約夜半進攻東南北三面都布雲梯缺其西面而伏兵於城外以待其逸諸將士奮勇先登黎明入城賊將朱福不能敵率衆千餘開西門遁伏兵生擒之盡殺其

卒城中僞文武官員無一得出悉戮以殉天台仙居次第恢復時

康親王統領大兵前赴金華府命副都統馬哈達等往至道山討僞都督徐尚潮遣總兵鮑虎等往嚴州討僞總兵馮公武而義烏武義淳安遂安諸縣仍歸版圖惟僞恢復疆伯王國斌屯聚金衢交界屢征不服諸逆皆藉為聲援其勢橫甚

康親王命平南將軍賴塔同總督李之芳鎮守衢州時有東陽巨姓吳良森者曾以鄉勇恢復縣城沉毅多智謀

平定新東紀畧 三  
康親王禮而致之幕下授爲招撫僉事道與叅贊閣學紀密議  
往招王國斌而散其黨良森遂偕其邑人胡之灝從間道  
入賊營以計挾其二子王之傑赴行臺歸欵總督  
李之芳授以副將職銜同吳良森四嚮招徠凡被脅從賊  
者許投首以朱印識其背爲良民歸順者衆而僞都督徐  
尚潮仍據桃花嶺納諸亡命總督李之芳大戒師徒令援  
勦副將詹六奇田萬侯都司張國勲姜壇輩各以所部自  
大嵐山轉戰而前歷金坑銀場諸寨

康親王又遣都統馬哈達總兵陳世凱溫處道姚啟聖領兵進  
勦大破之尚潮走僞副將林某屯大溪灘亦全軍覆沒于  
是馬江二逆之兵俱潰

康親王命都統馬哈達等乘勝討僞都尉連登雲副將田萬侯  
等討僞都督馮公輔皆大勝而歸恢復永康縉雲宣平諸  
縣往

貝子既恢復天台仙居二縣分遣各員安撫百姓將進處黃巖  
親巡各營見田野荒蕪慨然曰民以食爲天及今不種秋  
成安望百姓即不死於鋒鏑亦死於飢餓矣可令鄉兵速  
歸力作其被脅割辯者許其入城貿易文武官弁不得借

端盤詰妄指為賊至婦女有本夫及親屬者准其領回一時歡聲動地顧山賊雖已掃除而沿海寇盜尚不時出沒索民供應糧餉不給則立遭其禍給之則官疑通賊復有身家性命之憂

貝子憫之立授提督常進功為水師統轄協同塘關總兵朱萬華等領兵五千由台州往寧波相機征勦抵河水門遇賊船百餘座行列整齊鋒刃照耀前來迎戰我軍分左右衝入定海守備福成射殺一執纛者賊船遂亂大敗之次日進海門賊將朱飛熊率眾拒之凡數十合勝負未分飛熊

持戟接戰乘勢躍入我舟欲刺進功左右鳥鎗齊發中胸死飛熊既死海上羣賊惴惴不知所措其屬偽都督僉事李榮春偽副將監理等各率偽員自縛請降進功受之班師而歸

貝子開譙邸第論功行賞滿帥啓請進取黃巖縣

貝子曰半年以來將士勞瘁兼以水雨連綿凡屯扎處所多苦潮濕北人不習水土間有病者今方溽暑又驅而跋履險阻益之疲憊遇賊其能戰乎戰一不利則賊勢轉強我兵轉怯請師救援曠日遲久爾時進退俱受賊制此所以按

兵不動也滿帥又啟曰迭奉

康親王嚴檄敦促萬一以頓兵奏

聞可柰何

貝子曰吾期動出萬全上為

主擴清疆土下為百姓奠安室家敢懼懼叅處玩視軍機乎其

姑俟之秋涼焉蓋

貝子之公而忘私國而忘家有如此者秋七月議復黃巖黃巖

憑山帶江賊水陸列營我兵不能飛渡

貝子思此處必有間道可超出賊後使人密探繪圖以呈報從

土木額踰茅坪嶺可抵縣境又密使前仙居令台道覆勘

於是授圖副都統機爾他佈倭申巴圖魯等前往伐木運

石為棧以濟星夜統兵直達烏巖出賊寨之後賊大驚相

顧錯愕偽都督吳長春偽總兵劉秉仁引馬步兵萬餘扼

於半山嶺機爾他佈等奮呼先登令下馬戰別以奇兵縱

橫分合之賊首尾不能照應大敗走吳長春受戮殺賊四

千有奇追至涼蓬隘口又殺偽副將黃文玉等三百餘人

賊仗遂窮曾養性拔營宵遁退保溫州

貝子親督師往追遇於黃土額賊將列馬步兵三隊以拒

貝子親麾進擊賊潰奔入黃巖城我軍圍之偽副將朱正三等獻城歸順黃巖復台州之圍遂解

貝子撫卹百姓留兵六百名守之而率兵三千進取溫州至樂清縣賊船林列

大軍從海上來者尚未得到大江又無船隻可渡謀報沿山行百餘里至沙頭地方可以過得但崖懸壁峭騎不能過步行恐甚難耳

貝子下令即從此路進發兵分三隊陸續啟行

貝子身先士卒自牽所騎之馬歷登險阻失足傷手指又輜重

行李不能即至

貝子風餐露宿忘其艱苦將士請緩行以待後旅

貝子曰方今寇逼城垣百姓如在倒懸

聖天子宵旰殷憂吾恨不滅此朝食敢辭勞瘁一時環而聽者無不感激思奮至沙頭嶺前仙居令鄭錄勲曰去此二十里為上亭嶺額下臨大江賊水陸設備堅甲利兵以待我師賊首曾養性祖弘勲縱兵焚劫居民望

王師真不啻大旱之望雲霓也

貝子惻然久之令副都統伯穆黑林提督段應舉等領前隊兵



副都統機爾他佈領二隊兵而親督四等他佈囊和機格爾等領三隊兵相繼而進擊敗水陸之賊殺偽總兵劉秉仁等獲器械鎗砲無算而馬仕王張廣文復領水陸兵三萬從嶺巔排至江口以禦中隔小河未便進攻

貝子令烏穆都喇粘等領軍挑戰賊料彼衆我寡且客主之勢又不相當無難取勝盡統水陸兵渡河而戰

貝子一面拍麾擊殺一面令右翼兵直據山巔斷其歸路大敗之擠入河中我軍鎗砲并發數萬之衆無一生者屍積如山河水為之不流一時偽官相繼歸順太平樂清青田三

縣大荆磐石二衛盡歸版圖於是統兵徑赴温州至越和嶺遙望賊兵蜂屯蟻聚

貝子曰不用疑兵未可濟也乃下令安營遣數百騎登下馮山鳴金擂鼓賊瞭望信為不復進攻我師遂得潛濟溪口直抵郡下據西山列營賊大駭驚以為神亦引兵退守郡城更益福建新兵八千與平陽瑞安石塘之賊合水陸四萬有餘分為八支或對壘軍前或掩襲營後或乘夜出犯或分兵侵掠

貝子調度官軍隨機應變一敗之於上塘再敗之於溫州三敗

之於得勝山四敗之於八帶橋五敗之於溫溪偽副將朱起龍首棄妻子出城歸順其餘大小偽官相繼降者不下數百員斬獲生擒者又不下五六十員殺賊三萬有奇數月之間攻內攘外戰無不克雖亘古名將蔑以加此然而精血頓耗連落二齒矣時方炎熱奉

康親王檄調回休養

貝子遂撤兵回處州時以石塘未靖為慮日夜商畧攻取事宜迨秋氣漸爽

康親王統領大軍直抵衢州命平南將軍賴塔領滿漢兵取大

極灘斷賊糧路總督李之芳以二渡關為江西要路偽左將軍曾養性偽經畧蔣德軫連營固守梗不能通至是養性聞耿逆漳泉被圍分兵往援命逆黨毛念益守青湖金應祐守仙霞之芳詎得其形遣謀招撫念益持兩端守稍懈應祐開關迎降我師乘勝入關江西之路遂通而賴塔亦大敗偽驍騎馬九王奪取大極灘賊勢遂窘貝子提師啟行溫鎮陳世凱啓曰石塘為四達之衢亦入閩捷徑今偽驍騎連登雲偽都督劉清等以二萬餘衆拒守一年不先取此則松陽未可得也

貝子躡之遂進攻石塘閱視賊營皆憑山阻險顧盼躊躇謂不得賊營後大山安營列寨則勢難猝破下令速造雲梯約二更攻寨使伯穆黑林等領滿漢綠旂兵由雙林張村口伐樹闢徑魚貫而上親督援兵徒步登山會大霧賊未覺也

貝子直至木城分兵三支指示方畧擊破老巢而別營賊兵四面起應攻我營盤

貝子令陳世凱等擊敗之盡奪其寨

貝子曰賊氣已喪隔河之賊可不戰而退矣伯穆黑林等分兵

進擊連拔三營大破連登雲之衆數十萬戮偽官賊兵無算焚其營寨所獲船隻米穀盔甲器械不可勝計而雲和慶元松陽等縣悉平浙東底定耿逆勢孤其妻格格先命其子以餉迎

王師遂歸欵養性聞之亦以溫州降